

Plenchi

Bèl a bati

TRINGG TRINGGG bèlèm..... TRINGG TRINGGG bèlèm.....

Bin bin riba nos plenchi paso nos a sinti bo falta. Ta basta tempu nos tin sin bati blèki. Anto ya ba kustumbra ku nos bleki ta dunabu gana di balia paso e ta kargá ku positivismo.

Un año eskolar fruktífero pa tur esnan den enseñansa. Pasenshi, perseveransha pero espesialmente hopi amor pa por traha e año aki. Nos a kuminsá año eskolar yen di plan i energia. E konferensha di RK e año aki a tabatin komo tema “Wellness”. Den tur loke nos ta hasi i plania, salú ta importante i tin diferente manera ku por traha riba nos salú. Nos tin hopi responsabilidad tur dia, komo ama/homber di kas, mayor, ruman, primu, komo trahadó i kolega. Diferente pèchi pa un solo persona. Hopi biaha dor di esaki nos ta lubidá nos mes komo persona. Nos nesesidat pa sosegá, komo salú i na ora, hasi ehersisio i chill. Hinka den bo agenda di wikènt maske ta un ora kada dia pa bo hasi algu pa bo mes. Algu pa kontribuí na bo salú.

Dal bo té di yerba mainta, hasi bo trabounan pendiente, sisti e stoma ku un plato salú, dal un siesta pa despues bo bai laman bai tira un kabes baha tur stress.

Un felis wikènt pa bo.

Riba roster

Nos hermana isla Sint Maarten a keda asotá pa doña Irma, un orkan kategoria 5 ku a hasi basta bochincha aya.

Den bida tin hopi buelta. Tin dia abo mester di yudansa i konsuelo i otro biaha abo ta esun ku mester duna. Ora esun ta debil pa kualke motibu, e otro tin ku duné un man pa yude lanta para. Asina nos mester kombibí ku otro. Nos skolnan ta koperando en grande ku nos hermana isla na diferente manera. Un danki di kurason pa boso generosidat i boso empatia. Tin yudansa finansiero, tin yudansa pa un lugá den skol, tin yudansa den forma di kuminda, tin yudansa den sosten i orashon.

Tur ta yuda, paso kada granito ta yuda.

Riba nos lista di prioridat nos komo katólíko tin pa yuda esnan den nesesidat te kaminda nos por.

Not'é riba bòrchi

Ultimo simanan nos ya no por papia di kalor mas sino di hooopi kalor. Una ku bo bira tur hende ta sklama di kalor. Kada bes ku nos kere ku awor si ta e ultimo dlanan di e kalor ekstremo, ta resultá ku e ta bolbe sigui tèst nos pasenshi. Mirando tur e gritunan di kalor di tantu maestronan komo hóbennan, nos a tuma desishon pa nos adaptá e roster di skol despues di konsultá ku esnan responsabel. No ta tur skol a hasi uso di e oportunitat krea, paso no ta tur 52 skol tin mesun kondishonnan. Kaminda tin erko, ku ta minimal, por a sigui te 2 or. Nos ta spera ku pa djaluna awor kos lo normalisá un poko pa nos sali for di eskala di hooopi kalor bai kalor.

Nos ta sigui traha ku ayudo di nos mayornan i tur ku ke invertí den enseñansa pa yega na solushon struktural pa e problema aki.

Den agènda

Liber di skol:

9 oktober pa 13 oktober

Dia speshal

5 oktober dia di dosente

10 oktober dia Pais Korsou

Riba rapòrt

Proyekto-piloto 'Leerorkest Curaçao' a kuminsa oficialmente

Djaweps 7 di sèptèmber a kuminsá e proyekto-piloto speshal 'Leerorkest Curacao' na Kolegio Maria Auxilliadora. Alumnonan di e skol aki lo haña lès di músika serka profeshonalnan di músika i pa na final forma un orkesta. E proyekto-piloto 'Leerorkest Curacao' aki lo duna diferente presentashonnan i na final lo sera e aña aki ku un presentashon grandi riba 2 di yüli riba Brionplein.

Djaweps dia 7 di sèptèmber 2017, tabata e inisio oficial di e promé lèsnan na Kolegio Maria Auxilliadora, Santa Maria 80, (8:30 am)e skol ku Tania Kross a bishitá. Tania ta un di embahadornan di e proyekto aki. Muchanan di Santa Maria, Kanga, Dein, Cabo verde i Stenen Koral ta bishitá e skol aki. Den lunanan ku a pasa a selekshoná e dosentenan di músika di Kòrsou ku lo haña training serka e dosente prinsipal di e proyekto den e método ku lo usa.

‘Leerorkest Curacao’ ta algu nobo ku a sali for di e ‘Leerorkest Nederland’ ku ta èksistí mas ku 11 aña kaba. Fia kada mucha un instrumento, siñé toka esaki I lag’è toka huntu den un orkesta símfonika live, dilanti un públiko grandi I kisas tambe na radio i/òf televishon.

E idea ta pa hasi e muchanan orguyoso, dunanan plaser, siñanan algu i tambe mustranan kiko ta tur loke nan por ku e guia, atenshon i dedikashon. Esaki sigur e muchanan ku ta biba den e barionan kaminda enseñansa di músika i toka den orkesta no ta algu kustumbrá.

Segun Marco de Souza, fundadó di ‘Leerorkest’, tur kos a kuminsá ku ora nan a disidí bòltu e kosnan. “ora nos a kuminsá mas ku 10 aña pasá na Amsterdam Zuidoost, nos a ripará ku e muchanan no tbt bin e skol di músika. Pues nos a disidí hiba e skol di músika pa nan pero durante orario di skol, pasó bo tin tur huntu I bo por alkansá tur. I awor nos ta ban hasi meskos aki na Kòrsou. Nos ta kuminsá den Santa Maria pero di nos parti hopi skol mas lo por partisipá.”

Artistanan famoso i konosí lokalmente y international, manera Tania Kross, Izaline Calister I Noraly Beyer, tbt dispuesto pa partisipá den e proyekto di ‘Leerorkest Curacao’. Dennis Aalse, dirigente di orkesta hubenil di Kòrsou ta fungi komo konsehero artístiko. Den estrecho koperashon ku orkesta hubenil Curaçao di Dennis Aalse, Do-Re-Music, Kurá di Arte, Kiwanis Piscadera, dosentenan I komishon di mayor di Kolegio Maria Auxilliadora i RK Schoolbestuur lo traha un infrastruktura nobo I desaroyá un vishon nobo pa enseñansa di músika i ehekutá esakinan.



Un prechi

Departamentu di IT di RK a organisá un tayer masha interesante pa skolnan. Nan a duna nan hèrmènt práktiko riba tereno di IT pa por apliká den klas mesora.





Mucha djispou

Tarick ta sinta den klas ta drai rònt i ta soda pipita pa pipita. Mener ta blo ta papia i ta splika kon ta kalkulá “oppervlakte”. Dado momento Tarick no tabata por mas. El a tuma palabra: “Mener mener, stòp di papia papia papia mener no ta mira kon mi ta soda aki. Sofoká”.